

Times Today BD

আন্তর্জাতিক ডেস্ক | আন্তর্জাতিক | 07 May, 2025

ভারতের মিসাইল হামলার জবাবে দেশটির পাঁচটি যুদ্ধবিমান ভূপাতিত করার কথা আগেই জানিয়েছে পাকিস্তানের সামরিক বাহিনী। তবে ভারতের পক্ষ থেকে এই দাবি নিশ্চিত করা হয়নি।

অবশ্য স্থানীয় সরকারের বেশ কয়েকটি সূত্রের বরাত দিয়ে বার্তাসংস্থা রয়টার্স জানিয়েছে, ভারতের জম্মু ও কাশ্মিরে তিনটি যুদ্ধবিমান বিধ্বস্ত হয়েছে। বুধবার (৭ মে) এক প্রতিবেদনে এই তথ্য জানিয়েছে বার্তাসংস্থাটি।

বার্তাসংস্থাটি বলছে, বুধবার ভারতের জম্মু ও কাশ্মির অঞ্চলে তিনটি যুদ্ধবিমান বিধ্বস্ত হয়েছে বলে স্থানীয় সরকারের চারটি সূত্র রয়টার্সকে জানিয়েছে। ভারত সীমান্তের ওপারে পাকিস্তানের ৯টি “সন্ত্রাসী অবকাঠামোতে” আঘাত হানার কথা বলার কয়েক ঘণ্টা পরই এই তথ্য জানানো হয়েছে।

পাকিস্তানের একজন সামরিক মুখপাত্র রয়টার্সকে জানিয়েছেন, পাকিস্তানি সামরিক বাহিনী পাঁচটি ভারতীয় বিমান গুলি করে ভূপাতিত করেছে। যদিও ভারত এই দাবি নিশ্চিত করেনি।

এদিকে পাকিস্তানি সংবাদমাধ্যম জিও নিউজ জানিয়েছে, ভারত পাকিস্তানের অভ্যন্তরে একাধিক হামলা চালানোর পর পাকিস্তান পাঁচটি ভারতীয় যুদ্ধবিমান গুলি করে ভূপাতিত করেছে বলে পাকিস্তানের সামরিক বাহিনীর মিডিয়া উইং আন্তঃবাহিনী জনসংযোগ পরিদপ্তরের (আইএসপিআর) মহাপরিচালক লেফটেন্যান্ট জেনারেল আহমেদ শরীফ চৌধুরী নিশ্চিত করেছেন।

তিনি উল্লেখ করেছেন, সমস্ত ভারতীয় বিমান তাদের আকাশসীমায় গুলি করে ভূপাতিত করা হয়েছে।

পাকিস্তানের এই প্রধান সামরিক মুখপাত্রের মতে, কাশ্মিরের নিয়ন্ত্রণরেখা (এলওসি) বরাবর বর্তমানে তীব্র গুলি বিনিময় চলছে। তিনি আরও নিশ্চিত করেছেন, পাকিস্তান বিমান বাহিনীর (পিএএফ) সমস্ত বিমান নিরাপদ রয়েছে।

এদিকে পাকিস্তানের বেশ কয়েকটি নিরাপত্তা সূত্র জিও নিউজকে জানিয়েছে, পাকিস্তানের হামলায় ভূপাতিত ভারতীয় বিমানগুলোর মধ্যে তিনটি রাফাল ফাইটার জেট, একটি মিগ-২৯ এবং একটি এসইউ-৩০ যুদ্ধবিমান রয়েছে।

© 2025 TimesToday. All Rights Reserved.

Generated on 19 June, 2025 02:28

URL: <https://timestodaybd.com/international/7758072081>